

〔古京遺文〕那須直韋提碑○中略

碑在下野國那須郡湯津上村，俗稱笠石，舊在荆棘中，土人觸犯者，必蒙殃祟，有僧圓順，以是事語梅平村人大金重貞者，梅平在水府封內，重貞以聞，義公○德川光圀實貞享四年之秋也，義公好古，聞之，即命臣佐々宗淳就搨之，元祿四年三月，更命有司封築，安碑於其上，建亭以護之，歸然存于今者，公之賜也，蒙齋曰：永昌元年，當作朱鳥四年，蓋係洗者改作，今審觀之，字樣不類，其說似可信，朱鳥四年五年六年七年見萬葉集，朱鳥七年見靈異記，不得據史斷言朱鳥之號僅一年也，飛鳥淨御原宮天武天皇所營，帝崩後，持統天皇嗣御是宮，至八年朱鳥九年始遷都藤原，故碑謂持統天皇之時，猶稱淨御原大宮也，猪名大村墓志所云：後清原聖朝即是也，追大壹天武天皇所制爵位，四十八階之第三十三等，那須直姓也，所謂胙之士而命之氏者，姓氏錄不載，其祖不詳，韋提名也，佐々氏釋作那須，宣事提非是，評督官名，猶後世郡領也，既於妙心寺鐘跋詳之，白石新井先生云：評督是都督之誤，亦不知古時有評督之職也，康子，即庚子，係文武天皇之四年，庚作康，又見伊福吉部氏墓志，唯未見西土人以庚爲康者耳，殄故猶言病死也，佐々氏釋作彌，故疑爲物故之訛，並非是殄字，旁从夕，下文殄字同，漢李翊夫人碑，殄字作殄，與此同法，偲訓志奴布，思慕其人之義，萬葉集多用之，蓋是間會意字，非詩所謂美且偲之偲，白石先生釋爲德字，亦非，棟樑，卽棟梁，淮南主術訓，魏崔浩沈法會文，北魏文帝弔比干文，唐虞世南書破邪論，皆用此字，蓋連上字，增木榜者，猶鳳皇作鳳凰，琅邪作琅琊之類也，無翼長飛，無根更固，蓋本于管子或篇無翼而飛者聲也，無根而固者情也之語，唐高宗三藏聖教記亦云：名無翼而長飛，道無根永固，然銘文多不可讀，諸家往々強作解事，不可據信，今姑從佐々氏所釋，蒙齋以是碑爲持統天皇時物，則誤矣。

〔續日本紀元四〕和銅元年三月丙午，從五位下多治比真人廣成爲下野守。

〔續日本紀元八〕養老三年七月庚子，始置按察使，令○中略武藏國守正四位下多治比真人縣守管相模